

Ìsili: su 21 de cabudanni torrat “Artis e Ortus”



Su Comunu de Ìsili organizat e cumbidat a totus a sa de IV editzionis de “Artis e Ortus”: una gerronada de festa e de spàssiu, ma fintzas de cultura e arti, passendi peri su territòriu e s’archeologia.

Totu su stradoni e is bias de su centru stòricu ant a mudai cara po cust’ocasioni, aprontendusi po arriciri ammostas artìsticas e de artigianau, espositzionis, tastu e bédida de produtus agroalimentaris, laboratòrius, leturas e ispetàculus.

Medas is òspitis chi ant a animai is pratzas e is bias, intre custus su grupu traditzionali de is “Tumbarinos” de Gavoi, sa banda musicali itineranti SeuinStreet Band, su Coru Tasis e is musicistas de sa Music Academy de Ìsili.

Po is pipius, sa pratzas de Santu Giusepi s’at a animai cun giogus traditzionalis po is pipius e leturas a incuru de su Sistema Bibliotecàriu e de su Sportellu Lìngua Sarda Sarcidanu-Barbàgia de Seulu. Po mannus e piticus, s’ant a esibiri is artistas itinerantis e s’at a pòdiri fai unu giru in su trenixeddu a gomas.

Ant a èssiri obertus po is abbisitas ghiadas su Nuraxi de Is Paras, su Museu MARATE, su Teatru de Sant’Antoni, su Montigranàticu, su Lagu de Santu Serbestianu.